

Ter quater ingenijs felix, spectabilis altis
 Turribus: hæc Senæ celsa sunt mœnia: Parma
 Armigeræ sunt hæc, prædiuitis ubere gleba.
 Parthenopen hæc parte vides: hæc parte capaci
 Insignis portu frondosis collibus Ancon
 Cernitur: hic celebris latis Ferraria campis
 Apparet, dices Ligurum, Insubrumque potentum
 Sint ubi, quoue loco posita, si forte requiris,
 Prima vrbes: est, nonne vides? hic altera: at illic
 Altera, sed video geminam quod luminis acrem
 Intendas aciem: nonne huc? surgentia cælo
 Hic ubi se tollunt multa arte palatia, tecta
 Regia, ceu medio in pelago molimine magno
 Constructa ac fabricata manu, fundamina magni
 Neptuni, immota loco perstantia, quamuis
 Æstuet, atque imis vdas eructet arenas
 Sedibus iratum pelagus? terræq; mariq;
 Vrbs hæc est Venetum, longos dominata per annos.
 Hic Drepani portus, tuta hic statione Panormus:
 Hic Mamertini qua mittit munera Bacchi.
 Ecce, Tridentina letis in vallibus arcis
 Hic surgunt turres: montosa, atque aspera magnos
 Hic bis sex unum & pagos das cernere clarè
 Heluetia, æternum firmatos fœdere certo.
 Dulcibus hic studijs, & mirè dedita Musis
 Argentina sacris: illic Augusta, per Orbem
 Cognita terrarum, celeberrima, nomine verè
 Reque augusta, Lyco gaudens pulcherrima, latis
 Mœnibus, ingenijs operosæ addicta Mineruæ
 Acribus inprimis, hæc Noriberga vetustis
 Sedibus, en, illa est, diues V Vormatia campis
 Fertilibus, Procerum celebris conuentibus: illi
 Quæ vicina iacet, laudata est Spira, liquores
 Dulcia nectareos qua fundit vina, perita
 Sacrosanctarum legum. Thau. Quæ deinde Panopte
 Vicina hæc vrbes, præclaris mœnibus ambæ,
 Ambæ illæ eximiæ? Pan. Rogitas? harum altera, Rheni
 Quæ posita ad ripas est dicta Maguntia: magnam
 Hanc statuit molem quondam Germania victrix:
 Mansura hæc posuit Drusi monumenta subacti.
 Thau. Ergo hæc, quam perhibent populisq; orbisq; dedisse
 Infanda arte typos arguta ex arte, perenne,
 Diuinumq; opus, inuentum admirabile, visum
 Haud vnquam? Pan. Illa ipsa: æternum cui plurima debet
 Posteritas olim tanto pro munere. Thau. dic nunc
 Altera quæ? Pan. dicam: rapido est Francfordia Mœno
 Nobilis, excellens claris virtutibus: illa
 Regales generose tibi dat Cæsar honores,

Sceptra-